

Date – 02/03/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Chief Minister Pu Lalduhoma'n Kumin Chapchar Kut chu zofate inpumkhatna ti zualtu a nih ngei a beisei tih a sawi.
2. UD&PA Minister Pu K. Sapdanga chuan Aizawl Smart City hnuai hmalakna thawh lai mek hmun 8 ami a tlawh.
3. Kum 2024 chhung khan KTP member 615 an thi a, chung zinga za zela 87.96% chu mipa an ni.
4. Prime Minister Narendra Modi chuan India in hmasawna lam pan a tumna chu a chiang hle niin a sawi



CHAPCHAR KUT

Chief Minister Pu Lalduhoma'n Kumin Chapchar Kut chu zofate inpumkhatna ti zualtu a nih ngei a beisei a ti a, khawvel hmuha Mizo hnam ziarang leh ropui tak phochhuahna hun anih ngei a beisei tih a sawi bawk.

Chief Minister chuan Instagram kaltlangin he thu hi sawiin kumin Chapchar Kut chu zofa hmun hrang hranga awm te ropui taka hmang turin a sawm a, Chapchar Kut thupui Hawihhawmna chu Mizo hnam ziarang ropui tak, khawtlang nun leh inlaichinna ah bet tlat a ni a, he kut hmang hian he ze ropui tak hi chawi sana a awm theih nan mi zawng zawng tel turin a sawm a ni.

Art and Culture Department bultumin kumin Chapchar Kut hi Aizawl bakah District headquarter zawng zawngah leh rampawna Mizoram House-ah hman a ni dawn a, thupui atan Hawihhawmna tih hman a ni dawn a ni.

Chapchar Kut hmanna pui ber chu Aizawl lammualah March ni 6 leh ni 7 ah neih tura duan a ni a. Ni 6-ah hian Home Minister Pu K. Sapdanga chu khuallian a ni ang a, ni 7-ah Chief Minister Pu Lalduhoma khuallian a ni dawn a, Kut puala programme pawimawh dang chu March ni 3 atanga kalpui tan tur a ni.

March ni 3 ah hian Chapchar Kut pual Tlan (Kut Run) buatsaih a ni dawn a, ni 4 ah Flower Show leh Painting & Exhibition Show kalpui tan tura ruahman niin March ni 5 ah Chapchar Kut heritage tour buatsaih a ni ang a, he mi ni vek hian Falkawn Zokhuaah Mizo Pi leh pute Nun tarlanna hun buatsaih tan a ni dawn a. A tuk ni 6-ah pawh neih chunzawm tur niin Ni 5-ah vek hian Kut pual Handloom, Textile & Handicraft Exhibition and Food Processing & Food Court hawn a ni ang a, exhibition & food court hian ni 7 thleng a awh dawn a ni.



UD&PA MINISTER

UD&PA Minister Pu K. Sapdanga chuan Aizawl Smart City hnuai hmalakna thawh lai mek hmun 8 ami a tlawh.

Minister-in nimina a tlawh te hi High Field a Multipurpose Ground, Dawrupuia Aizawl City Centre, Zemabawk Playground, Zuangtui Indoor Stadium, Durtlang Playground, Chaltlang Multipurpose Sports Hall, Chaltlang Tourist Lodge leh Hlimen Playground te an ni a. Minister hian a satu contractor-te kawmin uluk takin hnathawh kal mek leh hmabak la awmte a zawtfiah a ni.

High Field chu cheng vaibelchhe 16 senga sak tur a ni a, kum 2023 February thlaah hna thawh tan a ni a, hna hi za zela 71% thawh zawh tawh niin kumin December thla hian zawhfel an inbeisei. Aizawl City Centre chu cheng vaibelchhe 40.35 senga sak tur a ni a, kum 2022 October thlaah hna thawh tan a ni a, hna hi za zela 59% thawh zawh tawh niin kum 2026 December thlaah zawhfel an inbeisei.

UD&PA Minister hi Aizawl Smart City Ltd. CEO Pu CC Lalchhuangkima, UD&PA Joint Secretary Pi Zarzokimi bakah Aizawl Smart City Ltd. leh UD&PA Secretariat atangin official thahnem takin an tawiawm a ni.



KTP

Kristian Thalai Pawl (KTP) report-a a lan danin, kum 2024 chhung khan KTP member 615 an thi a, chung zinga za zela 87.96% chu mipa an ni. 2024 chhunga thi zat hi kum hmasa 2023 aiin mi 63-in an tam zawk.

Chawnpui Presbyterian Kohhran Biak Inah KTP Rorel Inkhawm vawi 11-na neih mek niin, kum 2024 chhunga KTP member thi 615 zinga 541 (87.96%) chu mipa an ni a, mi 74 chu hmeichhia niin, thi zawng zawng atangin 12.04% an ni.

Kum 2024 chhunga KTP member thi tamna ber bial chu Republic Veng bial niin, mi 13 (Mipa 10 & Hmeichhia 3) an thi a; mi 12 thi awmna Champhai Vengthlang bial leh Ramhlun North bialte'n an dawt. Hetih lai hian, KTP member thi awm lohna pastor bial 62 a awm.

KTP-ah hian member 1,77,548 an awm mek a, mipa 1,07,535 leh hmeichhia 70,013 an ni. Rorel Inkhawm 2025 hi February 28 Zirtawpni zan khan tan a ni a, zaninah a tiak ang.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

GINGER – MAMIT

Mamit district chhungah Sawhthing hralh chhuah mek a ni a, tunah sawhthing quintal 403 leh kg 46 hralh chhuah a ni tawh.

Mamit district-ah hian Sawhthing hralhna/leina hmun 6 - Mamit, Kangmun, Reiek, Rawpuichhip, West Phaileng, leh Tuidamah te awmin heng hmun atangte hian sawhthing hralh/lei thin tura ruahman a ni a. Zirtawpni kalta (February ni 21) khan Mamit district a a hmasa ber atan Kanghmum a dahkhawmna hmunah sawhthing hralh tan niin sawhthing quintal 214 hralh/lei a ni a, Thawhleini khan dah khawmna hmun dang Mamit ah quintal 97, W Phaileng ah quintal 86 leh kg 24 leh Tuidamah quintal 6 leh kg 22 te hralh a ni a, Rawpuichhip leh Reiek-ah erawh sawhthing hi buk/hralh chhuah a la ni lo thung a ni.

Sorkar hotute chuan district dang aiin Mamit district-ah hian sawhthing ling an tlem zawka a lan thu leh sawhthing lingtu tam takte chuan sawhthing chu cho a hralh nghal mai lovin a chi atan an la dah avangin Mamit district chhungah sawhthing quintal sing khat vel bak hralh chhuah theih an beisei loh thu an sawi a ni.

<><><>

TB

National TB Elimination Programme hnuai ram pum huap ni 100 chhung TB natna do beihpui thlakna, 100 days campaign kalpui mekah Mizorama mi 23321 endik tawh zingah TB vei mi 31 hmuhchhuak an ni.

National TB Elimination Programme hotuten Akashvani an hrilh danin ni 100 campaign hi nikum December ni 7 atanga kumin February ni 27 thleng neih a ni a. Mizoram chhunga district 4 Aizawl, Mamit, Champhai leh Serchhip district ah te neih a ni a. Aizawl district-a mi 10562 endik zingah TB vei mi 18 hmuhchhuah a ni a, Champhai district-a 5476 endik zingah 4, Mamit district a 3086 endik zingah TB vei mi 9 hmuhchhuah an ni.

Nikum chhung khan TB natna avang hian Aizawl district-ah nunna chan mi 269 an awm a, Champhai district-ah 27, Mamit district-ah 12 leh Serchhip district-ah 7 an awm a ni.

<><><>

CS

Chief Secy Khilli Ram Meena an Mamit tlawhin, Department hrang hrang official-te a kawm a.

Mamit District chhunga hmasawmna hna kalmekte chu tha taka a kal theih nan theihtawpchuaha ngaihtuahna tak tak seng turin a chah a, Mamit District dinhmun tha zawka ding tura tanrual a ngaih thu leh mipuite hnen thleng phak ngeia mahni line theuha taima taka hnathawk turin kalkhawmte a chah a ni.

District Bawrsap Pu K. Lalawmlova chuan Mamit District dinhmun tarlangin Mamit District chhungah mihring nuai 1 & 1290 an awm a, a zauzawng hi sq m 3025 a ni. Chenna in sing 2 & 902 awmin ziaak leh chhiar thiam tam lam hi hi zaa 84.93 a ni tih a sawi a ni.

Chief Secretary hian 132 KV Bairabi leh West Phaileng leh Mamit College-te a flawh a ni.

<><><>

PM

Post-Budget Webinar on Agriculture and Rural Prosperity hun hmanaah Prime Minister Narendra Modi chuan a thu a sawi a, India in hmasawna lam pan a tumna chu a chiang hle niin a sawi. A hma pawha a lo sawi tawh, sorkarin lo neih lama hmasawn leh thingtlang hmasawna chu sorkarin a tum zawn tak pahnih a ni tih a sawi bawk.

India chu loneitute chawikanna ram ni thei turin kan thawhho a tul thu a sawi a. Sorkar hmalakna te chu loneitu tinte hmasawna tur a ni a ti a. Agriculture chu hmasawna kawnga a hmasa ber anga ngaiin sorkar chuan loneitute ngaih pawimawh an ni a ti bawk. PM Kisan Samman Nidhi Yojana hnuaiah tun thlengin loneitute hnenah cheng vaibelchhe nuai 3.75 vel pek a nih tawh thu a sawi a. He scheme hnuaia kum tin sum leh paia tanpuina cheng sang ruk pek thin hian thingtlang economy a tichak hle niin a sawi.

Prime Minister chuan Union Budget-ah sorkarin ‘PM Dhan Dhaanya Krishi Yojana’ a tel tur thu a sawi a, hemi hnuaiah hian ram chhunga lo neia thawk chhuak hniam ber district 100 tih hmasawn chu ngaih pawimawh a nih tur thu a sawi. Prime Minister Modi chuan thingtlang economy tih hmasawn kawngah Sorkar a inpeih thu a sawi a. PM Awas Yojana-Gramin hnuaiah mi rethei maktaduai tam tak hnenah chenna in pek an ni tawh a ti bawk a. Kumin Union budget chuan thingtlang hmasawna a ngaipawimawh a, eizawna thar tam tak siam a nih tur thu a sawi bawk. Scheme kalpui mekte chu a hlawhtling zawka kalpui theih dan tur ngaihtuah mi zawng zawng a chah a. Budget-a thil tumte tihlawhtling turin lungrual taka thawhho a tul thu sawiin, hnathawktute tan la turin a chah bawk a ni.

<><><>